



Siva da bleras provas intensiv per igls cantadours è sonda sto igl punct culminont cugl concert da giubileum.

FOTOS F. BERGAMIN



Da gliunsch e da manevel è rivo igl auditori per assister agl concert da gala e cun 550 persungas era la sala ple tgi fullanda.

L'antiera Val è fatg ena stgava agl chor

100 onns Chor viril Surses

DA GION NUTEGN STGIER / ANR

■ **En concert cun en auditori incanto, passa 700 persungas alla festa populara e gratulaziuns da tot las varts pigl chor giubilar. La festività da giubileum 100 onns Chor viril Surses totga agl passo e cun nov tgatsch scumainza igl chor igl sies sagond tschentaner.** Sainza dubi è igl Chor viril Surses egn digls miglers chors digl Grischun e chegl è la furmazion musso sonda pasada cugl concert da gala. Gio set onns stat igl chor sot la direziun capavla da *Luzius Hassler*. Pigl concert da festa veva el tscharnia en program cun dus cantatas da scribents e cumponists indigens ed en bloc cun melodias classicas. Agl Chor viril Surses fon part 55 omens da vischnancas da Surses e la media da vigliadetna digls cantadours e 49 onns. Scu tar tot igls chors dattigl betg angl ena vart suglialeiva, mabagn er ena sumbrivanta. Uschia è igl chor betg sto activ digl 1948 anfignen igl 1956 perveia da mancanza d'interess digls cantadours. Plaschevlamaintg è chegl sa mido aint igl decurs digls onns ed oz totga igl chor tar egnas dallas fermas pitgas culturalas da Surmeir. Igls davos 40 onns è igl chor adegna canto cumposiziuns pi pretensiusas ed er ovras pi grondas.

Dus premaudiziuns

La sala Grava era fullanda sonda seira tigl concert da gala tgi è sto partia aint an dus

blocs. Lantschatta agl concert è do la canzung «Surses» tenor igls plects da pader Alexander Lozza e mess an notas da *Curo Mani*. La cantata «Igl mond digl paster pitschen» deriva dalla plema da *Giovanni Netzer* e per la melodia è sto responsabel *Gion Antoni Derungs*. La sagonda premaudiziun «Mosaic Sursenter» è cumponia *Gion Giuseppe Derungs*, tenor igls plects da *Mario Jegher*. Igl chor è interpreto fegn e sober tant igls pianos scu igls fortes e musso la qualitat ed igl potenzial digl chor. Chegl è pero er en grond maret digl premuro dirigent *Luzius Hassler*. La sagonda part è stada deditgeida agl cant classic cun ovras da Beethoven, Wagner, Mozart e Verdi e surtot igl toc «Evviva beviam» or dall'opra «Ernani» da Giuseppe Verdi è catto en fitg bung resung. Persvadia digl concert da gala on pero er igls quatter solists *Rilana Cadruvi*, *Ingrid Schütz*, *Christian Cantieni* e *Remo Weishaupt*. La dretga noda agl concert è pero do *Clau Scherrer* cugl accumpognamaint agl clavazign e pigl auditori ègl sto en delertg da vaseir cun tge fegnadad e sentimaint tgi igl musicist sursilvan dominescha igl instrumaint.

120 omens sen la tribuna

La dumengia è stada la festa populara ed igl pievel surmiran è nia an rotscha per gratular agl giubilar. Tranter igls giasts eran blers representants dallas autoritads politicadas, dalla Baseglia e dalla cul-

tura. Er la presidenta digl consegl grond *Agathe Bühler* è fatg onour agl chor cun esser dalla parteida. Igl bavagnaint musial è purschia igl Chor viril Surses e sessour è sies president *Pauli Dosch* benevento la raspada. Fatg impressiun agl auditori on las produzioni digls 80 scolars primars dalla 3. anfigen 6. classa da Surses.

Tgi an Surmeir è avant mang er en potenzial da bungs chors masdos on testifigia las produzioni digls chors masdos reunias, Coro misto Bivio, Chor cecilian Tinizong, Las Vouchs dalla Gelgia ed igl Chor masdo Stier-va/Mon.

La punt tranter mintga bloc on mintgama fatg sequenzas da films or dall'istorgia digl chor da giubileum. Igl davos saleid musical agl chor giubilar è nia da tot igls chors virils da Surses inclus igl Chor viril Alvra.

Cun quatter canzungs tradiziunalas on igls 120 omens purschia en delertg cantic ed incanto igls 700 preschaints. Cunsiglier guvernativ *Stefan Engler* è detg an sies pled da festa tgi igl scazi da canzungs vegia bagn sa mido, ma betg la communitad digl cant digls chors. Tranter igls gratulants è er sto *Roland Capeder*, igl parsoura digl District da cant Alvra. El è detg tgi sainza la prontadad da sa participar agls chors ed allas uniuns savassan chels betg exister. I dovra en tschert angaschamaint da mintgign per tgi las uniuns possan survivever.



Pigl giubileum da 100 onns è igl Chor viril Surses edia en disc cumpact e durant igl concert da gala è sto igl battesim. Igls padregns digl nov disc cumpact: *Pauli Dosch*, *Curo Mani*, *Gion Antoni Derungs* e *Stefan Engler* (da san.).



Dasgan esser cuntaints cugl concert da gala e cun la festa da giubileum. *Pauli Dosch*, parsoura digl Chor viril Surses ed igl dirigent *Luzius Hassler* (da san.).



Cun en matg canzungs on er igls scolars e scolaras da Surses gratulo agl Chor viril Surses.



Er la presidenta digl consegl grond *Agathe Bühler* è fatg onour agl giubilar.



Tar ena festa totga er ena liongia barsada.